

**Grad Novi Pazar  
Skupština grada  
Odbornička grupa SDA Sandžaka  
Novi Pazar  
04. maj 2022. godine**

**P R E D S J E D N I K U  
SKUPŠTINE GRADA NOVOG PAZARA**

Na osnovu člana 44. stav 1. i člana 149. Statuta grada Novog Pazara („Službeni list grada Novog Pazara“, broj 6/19), člana 44. stav 1. i člana 138. stav 1. Poslovnika Skupštine grada Novog Pazara („Službeni list grada Novog Pazara“, broj 6/19) podnosimo **PRIJEDLOG ODLUKE O POKRETANJU POSTUPKA ZA DOPUNU POSLOVNIKA SKUPŠTINE GRADA NOVOG PAZARA**, sa prijedlogom da se, shodno članu 109. Poslovnika Skupštine grada Novog Pazara, uvrsti u dnevni red na sjednici Skupštine grada koja će se održati 05. maja 2022. godine.

**Predsjednik odborničke grupe  
Ahmedin Škrijelj**

## **PRIJEDLOG**

Na osnovu člana 32. stav 1. tačka 1) i 20) Zakona o lokalnoj samoupravi („Službeni glasnik RS“, broj 129/2007, 83/2014 – dr. zakon, 101/2016 – dr. zakon i 47/2018), člana 46. stav 1. tačka 1) i 77) i člana 147. Statuta grada Novog Pazara, („Službeni list grada Novog Pazara“, broj 6/19), i člana 137. Poslovnika Skupštine grada Novog Pazara („Službeni list grada Novog Pazara“, broj 6/19), Skupština grada Novog Pazara na sjednici održanoj 05. maja 2022. godine, donosi

### **ODLUKU**

#### **o pokretanju postupka za dopunu Poslovnika Skupštine grada Novog Pazara**

##### **Član 1.**

Skupština grada Novog Pazara pokreće postupak za dopunu Poslovnika Skupštine grada Novog Pazara.

##### **Član 2.**

Komisija za statutarna, normativna i organizaciona pitanja, u roku od 30 dana od dana objavljivanja ove odluke, izradiće prijedlog dopune Poslovnika Skupštine grada Novog Pazara i isti će dostaviti Skupštini grada na usvajanje. .

Prijedlogom za dopunu Poslovnika Skupštine grada Novog Pazara, Komisija za statutarna, normativna i organizaciona pitanja utvrdiće:

- pravilo da odbornici Skupštine grada, na posebnim sjednicama Skupštine, najmanje dva put godišnje, u prisustvu Gradonačenika, zamjenika gradonačelnika, članova Gradskog vijeća i pomoćnika gradonačelnika, imaju pravo postavljati pitanja i dobijati odgovore i informacije u vezi sa pitanjima koja se odnose na rad izvršne gradske vlasti u Novom Pazaru i pitanja koja su od opšteg i zajedničkog interesa za građane Novog Pazara;
- pravilo kojim se Gradonačelnik, zamjenik gradonačelnika, članovi Gradskog vijeća (shodno svojoj resornoj zaduženosti) i pomoćnici gradonačelnika obavezuju da najmanje jednom godišnje podnesu pisani izvještaj o radu koji će razmatrati na sjednici Skupštine grada;

##### **Član 3.**

Ovu odluku objaviti u “Službenom listu grada Novog Pazara”.

### **SKUPŠTINA GRADA NOVOG PAZARA**

Broj:

U Novom Pazaru, \_\_\_\_\_. \_\_\_\_\_. 2022. godine

**PREDSJEDNIK**

Dr. Anela Šemsović

## **O B R A Z L O Ž E N J E:**

### **Pravni osnov za donošenje odluke:**

Pravni osnov za donošenje ove odluke je sadržan je u:

- članu 32. stav 1. tačka 1) i 20), Zakona o lokalnoj samoupravi;
- članu 46. stav 1. tačka 1) i 77) Statuta grada Novog Pazara;
- članu 147. Statuta grada Novog Pazara;
- članu 137. Poslovnika Skupštine grada Novog Pazara.

### **Razlozi za donošenje odluke:**

Donošenjem ove odluke Skupština grada osnažuje svoj politički autoritet i ulogu koju ima kao najviše predstavničko tijelo lokalne vlasti u Novom Pazaru direktno birano od strane građana.

Donošenjem ove odluke uvodi se i princip transparentnosti u radu lokalnih organa i funkcionera koji upravljaju lokalnom samoupravom u Novom Pazaru.

Jedna od zakonom utvrđenih uloga Skupštine grada u lokalnom političkom sistemu jeste i kontrola rada predstavnika izvršnih organa lokalne vlasti te staranje da predstavnici izvršnih organa svoj poslove, prava i obaveze vrše kvalitetno, nepristrasno, u skladu sa potrebama i opštim interesima građana u Novom Pazaru.

Odbornici kao direktno izabrani predstavnici građana imaju pravo i obavezu da na neposredan i institucionalan način odnosno na posebnim sjednicama Skupštine grada iniciraju raspravu i postavljaju pitanja Gradonačelniku, zamjeniku gradonačelnika, članovima Gradskog vijeća i pomoćnicima gradonačelnika u vezi sa pitanjima koja se odnose na rad izvršne gradske vlasti i pitanjima koja su od posebnog interesa za građane Novog Pazara.

Institut odborničkog pitanja nije dovoljno snažan mehanizam, čiji se značaj često i unižava načinom odgovaranja na pitanja odnosno činjenicom da se dješava da se nekad odgovori na odbornička pitanja uopšte i ne dostavljaju odbornicima, što dovodi do potrebe da se uspostavi čvršća i neposrednija kontrolna veza između odbornika i predstavnika gradske izvršne vlasti.

Usvajanjem ove odluke također se jača uloga odbornika i kreiraju uslovi da na efikasan način mogu biti spona između gradske vlasti i građana koji ih neposredno biraju i čije interese su dužni da štite i zastupaju.

Dosadašnja praksa i principi koji su primjenjivani u radu a suprotno zakonu i političkoj ulozi Skupštine grada, Skupštinu grada i odbornike sveli su na izvršioce ličnih, političkih i drugih interesa i potreba lokalnih izvršnih organa i pojedinaca u njihovom sastavu, a čiji interesi su često sukobljeni sa interesima građana.

Uspostavljenjem predloženih pravila odnosno dopunom Poslovnika na predložen način Skupština grada i njeni odbornici mogu u punom kapacitetu i sa punim pravnim i političkim autoritetom da vrše poslove i funkciju zbog koje ih građani biraju i zbog koje inače i postoji Skupština grada.

**Objašnjenje pojedinih rješenja propisanih ovom odlukom:**

**Član 1:** Ovim članom Skupština grada pokreće postupak i proceduru za dopunu Poslovnika Skupštine grada.

**Član 2:** Ovim članom utvrđeni su rok i obaveza Komisije za statutarna, normativna i organizaciona pitanja da utvrdi prijedlog za dopunu Poslovnika Skupštine grada te su date smjernice za izradu navedenog prijedloga.

**Član 3:** Propisana je obaveza objavljivanja u ove odluke u „Službenom listu grada Novog Pazara“

**Finansijska sredstva za sprovođenje ove odluke obezbijediće se u budžetu Grada Novog Pazara.**